

四庫全書

史部

欽定四庫全書

皇朝通志卷四十四

禮畧

軍禮

臣等謹按鄭樵通志列軍禮於賓禮之後恭查軍禮中有天子親征大閱大狩諸大典不應後於賓禮茲謹遵

大清通禮次第序於賓禮之前鄭志所載有天子諸侯

將出征類宜造禡并祭所過山川輒祭田獵講武
命將出征宣露布大射鄉射合朔伐鼓祭馬祖時
雖諸目茲遵會典序軍禮之大者曰

皇帝親征曰

親征凱旋曰

命將出征曰凱旋郊勞曰獻俘受俘曰

大閱曰

大狩遞著於篇以昭

聖代神武觀揚之盛烈鄭志所載諸目統已該備於篇
中矣至合朔伐鼓祭馬祖為祠祭司及太僕寺之
職掌不必列於軍禮而時儻一節亦非禮之重者
皆不復述焉

皇帝親征

崇德元年十月

太宗文皇帝親統大軍往征朝鮮先期告

天告

廟

頒行軍律令乃分兵為左右翼

聖駕出撫近門設鹵簿吹螺奏樂恭謁

堂子行三跪九叩禮復於

堂子外建立八纛吹螺奏樂行三跪九叩禮畢遂啟行二

年朝鮮國王服罪請降

康熙三十五年二月

聖祖仁皇帝以厄魯特噶爾丹悖天虐衆宜及時剪滅遣

發大兵分道並進

躬統六師由中道聲罪致討欽天監擇日啟行前期三日

分遣官祇告

天

地

太廟

社稷

太歲

頒行軍律令至日遣官致祭

卷四十四

道路

火礮之神

聖駕出宮進

堂子街門行三跪九叩禮畢致禮於

旗纛之神

聖駕啟行至西巴臺遣使齋

勅往諭噶爾丹

躬率前鋒軍進發噶爾丹知

聖駕親征驚遁

聖駕至克魯倫河盡獲鎧甲器械廬帳老弱於塗復率前
軍追至托諾分兵遣平北將軍追躡

聖駕回鑾是年九月噶爾丹收集散亡復圖侵掠大將軍
報至

聖祖仁皇帝親巡行北邊經理機務奉

諭朕出塞試鷹當減從而往諸色人等不得告請從行欽

天監擇定行軍日期左翼於十七日起程右翼於十八日起程至十九日

聖祖仁皇帝駕發京師十月至白塔向歸化城十一月至和坦和碩渡河是時河水未凍獨於渡處數里結為堅冰車馬坦行厄魯特來降者絡繹不絕噶爾丹知部曲潰散遣使納款復頒

勅諭遣使齎往招撫乃自棟斯垓統軍

回鑾三十六年二月

聖祖仁皇帝三舉北征仍分兩路出師

聖駕巡晉及秦就近調遣口外王貝勒台吉等先傳

諭旨止其請安進貢各地方大員止許單身至黃河兩岸

迎接時哈密已擒逆子俘送軍前青海八台吉懇

請來朝厄魯特之部長宰桑等皆納款求降噶爾

丹仰藥自殺丹濟拉諾顏格隆等攜其尸來歸朔

漠蕩平

聖駕自黃河舟行

回鑾

親征凱旋

崇德二年三月

太宗文皇帝率從征王貝勒大臣等班師朝鮮國王率羣臣出王城十里外跪送

太宗文皇帝下馬升座該王率羣臣行三跪九叩禮遣大臣二人送還國乃於軍中以班師行祭

旗纛禮將至

盛京二十里

太宗文皇帝入黃幄陞座王貝子文武羣臣各蒙古部長
等率衆排班奉慶賀表跪進行三跪九叩禮乃大
燕至

盛京日恭謁

堂子行禮還宮

康熙三十五年五月

聖祖仁皇帝自克勒和碩統軍

回鑾諸王大臣請行慶賀禮不許越五日撫遠大將軍大破賊於昭然多之地捷音至

聖祖仁皇帝出行營南門外設香案謝

天行三跪九叩禮入

行宮諸王大學士等進賀捷表文行慶賀禮六月

駕還京詣

堂子行三跪九叩禮還宮是年冬

聖祖仁皇帝北巡

駐蹕棟斯亥噶爾丹遣使納款乃降

勅招撫班師三十六年

聖祖仁皇帝復臨邊方

駐蹕狼居胥山指授諸將方畧截窮寇遁走之路噶爾丹

自料立就誅戮仰藥自殺餘黨率衆歸降朔漠蕩

平

聖祖仁皇帝以六師大捷於

行營外率

皇子諸王大臣謝

天行三跪九拜禮畢羣臣行慶賀禮

聖駕回京詣

堂子行禮畢還宮禮部奏請舉行慶典遣官祇告

天

地

太廟

社稷

永陵

福陵

昭陵

暫安奉殿

孝陵

皇后陵寢及

太歲

旗纛

敬神

狄鎮海瀆

帝王陵寢

先師闕里欽天監詠日

御殿受賀是日

頒詔天下復

允羣臣所請宣付史館編輯平定朔漢方畧

御筆勒銘磨崖刻石於察罕齊老托諾昭默多及狼居胥

山並建碑太學垂文紀勲昭示萬世

命將出征

崇德元年

太宗大皇帝命多羅武英郡王貝勒貝子等率諸大臣官

兵出征

親臨送至撫近門設鹵簿詣

堂子行禮又於

堂子外列護軍八纛行三跪九叩禮畢親送至演武場陞

御座召郡王貝勒貝子等近前誠諭遣行是年

命和碩睿親王和碩豫親王貝勒貝子公大臣率大軍出

征儀同

順治元年

世祖章皇帝命攝政和碩睿親王同多羅豫郡王貝勒貝

子公八旗都統副都統暨恭順懷順智順三王等

率兵畧定中原詣

堂子奏樂行禮又陳列八纛行禮畢大軍聲礮啟行是年

命和碩英親王為靖遠大將軍往征流寇賜之以

勅

世祖章皇帝御門陞座內院大臣奉三體

勅書宣讀畢奉

勅印授大將軍王及出征各官行三跪九叩禮畢啟行五

年

命都統為征南大將軍統兵征討江西賜之以

勅儀與元年同是年

命固山貝子為平西大將軍討陝西叛回賜

勅儀同

康熙十三年

命多羅順承郡王為寧南靖寇大將軍帥師之湖廣都統

為安西將軍帥師之四川

聖祖仁皇帝御殿陞座大學士奉

勅印授王王跪受行三跪九叩禮

聖駕詣

堂子行三跪九叩禮出征王及諸王貝勒都統尚書等官
咸隨行禮畢次於兵部所設燾前行三跪九叩禮
聖駕出長安右門外送行出征王以下副都統以上咸佩
弓矢上馬隨行至

駐馬處出征王疾馬趨過

聖駕還宮出征王行至列兵處禮部預設祖帳光祿寺備
茶禮兵二部堂官奉茶飲畢望

闕謝

恩禮成啟行是年八月

命王貝勒為大將軍出征遣親王內大臣出長安右門往

送十月

命和碩簡親王為揚威大將軍帥師之江寧和碩安親王
為定遠平寇大將軍帥師之廣東儀與是年正月

同二十九年

命和碩裕親王為撫遠大將軍出征以

皇子為副

聖祖仁皇帝御太和門大學士二人一奉

勅一奉印授王王跪受行禮畢

上出東直門視大將軍王等啟行三十五年

命領侍衛內大臣安北將軍伯為撫遠大將軍統西路大

兵出征厄魯特噶爾丹令先自歸化城乘驛速赴

京師至日大

頒燕賚

上御太和門陞殿作樂

命大將軍進至

御座前

親賜卮酒大將軍跪受退至階叩首飲都統大臣等均
以次進前

親賜卮酒副都統等亦近前侍衛賜酒自叅領以下每十
人為一班進至階上跪飲又令部院大臣侍衛等
徧視衆軍士飲燕畢

賜賚有差大將軍率衆官兵等謝

恩同叩首出遣大學士授大將軍

勅印令自京復赴歸化城啟行五十七年

命將征勦策旺阿喇卜坦

上親詣

堂子行禮拜

燹禮成

命內閣大臣頒給大將軍

勅印於

太和殿大將軍跪受謝

恩行禮畢啟行

雍正七年議准

命將出征之前日應遣官行告

廟禮起行之日應遣官祇告

奉先殿其祝文均由翰林院撰擬是年議准

命將出師授大將軍

勅印拜燹儀又議准

命使齋送

勅印大將軍於軍中恭受儀其儀節並見

大清會典通禮九年

命撫遠大將軍出征遣官祇告

奉先殿又遣官祭燾於德勝門

乾隆十三年

命大學士忠勇公經畧統兵討金川先期授

勅印出師之日隨

皇帝先詣

堂子行禮次祭

燔畢

駕至長安左門外

御黃幄陞座親賜經畧卮酒遂啟行

欽命大學士率侍衛為經畧祖道畢望

闕謝

恩啟行三十三年

命大學士忠勇公為經畧帥師討緬甸授

勅印

親祭

堂子祭

燔

御賜經畧卮酒祖道並如十三年之儀

臣等謹按

皇朝勇畧丕昭軍政整肅自

列聖以來

命將出師武功赫濯我

皇上神武震疊

光烈觀揚西師之役諸將士秉承

廟算不數年間平定伊犁回部拓地二萬餘里西陲永

靖及兩金川負

恩反噬上干

天討將軍副將軍等皆就軍中

命帥未行

命將出征之典而

聖天子運籌密勿指示機宜用能迅奏膚功武成耆定
益以見

天威之無遠弗屆也

命將出征凱旋

崇德元年和碩睿親王裕親王貝勒貝子等大兵
凱旋

太宗文皇帝率王貝勒貝子公等及文武各官出城十里

外郊勞設八纛吹螺作樂

上率衆拜

天行三跪九叩禮畢

御黃幄陞座出征王貝勒等跪進獻捷表文行三跪九叩

禮

諭出征王貝勒等近前行禮王等以次趨至

御前行一跪三叩禮

賜坐設燕

親賜卮酒及至京

躬率凱旋王貝勒貝子公大臣等謁

堂子行禮還宮

順治二年以南京平定

世祖章皇帝御殿攝政王率王公文武百官上表行慶賀

禮是日遣官祇告

天

地

太廟

社稷是年定國大將軍和碩豫親王班師還京

世祖章皇帝出正陽門於南苑北迎勞陳設大燾十作樂
率諸王貝勒文武百官拜

天行三跪九叩禮畢

御黃幄諸王列侍左右大將軍和碩豫親王及出師王貝
子各官朝見行三跪九叩禮和碩豫親王起近前

跪行謁見禮投誠諸王亦行禮分坐

賜茶畢還宮

康熙元年撫遠大將軍多羅信郡王等征滅察哈爾班師凱旋

聖祖仁皇帝率王公大臣迎勞於南苑之大紅門至京詣堂子行禮畢還宮十九年定遠平寇大將軍和碩安親王自湖廣班師凱旋

上率王公大臣出郊迎勞

駐蹕盧溝橋次日自

駐蹕處迎凱旋大軍於二十里外大軍既至率諸王大臣

等拜

天禮畢

御黃幄凱旋王大臣率將帥行禮

詔王近前

親起抱見行禮命近

御座左側坐諸大臣依次列坐其行間効力軍士亦依次

列坐

賜茶畢還宮是年大將軍和碩康親王自福建凱旋

上出郊迎勞儀同二十年以雲南報捷

上詣

太皇太后

皇太后宮奏聞行禮王以下文武百官集

乾清門行慶賀禮

上詣

孝陵躬行昭告遣官祇告

天

地

太廟

社稷二十一年定遠平寇大將軍貝子征南大將軍都
統等自雲南凱旋

上出郊迎勞如儀三十五年撫遠大將軍伯大破噶爾丹
於昭然多之地凱旋後留駐斥堠是歲冬

上巡狩至鄂爾多斯有

旨著大將軍伯自軍中乘驛前來將至

命皇子往迎

聖駕出黃幔城大將軍伯趨進跪請

聖安乃召入黃幔城

賜坐

賜茶遂危從於和坦和碩之南

賜大將軍伯

御佩橐鞬弓矢復遣還軍

雍正二年平定青海

世宗憲皇帝御殿受賀

御製平定青海碑文勒石太學昭示萬世

乾隆十四年春經畧大學士忠勇公自金川凱旋

命王公大臣迎勞於阜成門外至日

上御殿經畧大學士忠勇公率凱旋諸臣至丹陛上謝

恩行禮次日

賜燕於瀛臺行賞有差

御製平定金川碑文勒石太學並

命儒臣輯平定金川方略二十一年以伊犁平定提音
至

上御殿行慶賀禮遣官祇告

天

地

太廟

社稷

御製平定準噶爾碑文勒石太學二十五年西域平定
定邊將軍武毅謀勇公等凱旋還京

上駐蹕黃新莊親行郊勞是日法駕鹵簿全設在京王
公大臣等預至郊勞處分翼排班候隨行禮設黃
幄

御座於郊勞處正中南向兩翼設青幕各八東西向築
臺於黃幄正南臺上設將軍等凱旋燾於左右設

皇帝拜褥於臺上正中設下馬紅柱東西各一樂部設
鏡歌樂於臺左右設凱歌樂於

御道左右設鳴螺軍士按翼於臺左右屆時

皇帝出行宮至郊勞處軍士鳴螺鏡歌樂作將軍及從
征官兵咸甲冑於紅柱外跪恭請

聖安

皇帝降輿至臺上拜

天行三跪九拜禮將軍及王公大臣均隨行禮畢

御黃幄陞座將軍等行三跪九叩禮候

旨將軍大臣行抱見禮

賜坐

賜茶禮部堂官奏禮成

皇帝出御幄乘騎馬上凱歌樂作

駕還行宮是年

上御殿行慶賀禮祇告

天

地

太廟

社稷

賜宴將軍等於

紫光閣並命圖繪功臣百人像於

紫光閣中前五十功臣

御製贊詞後五十功臣

命儒臣擬贊並藏得勝靈燾及俘獲軍器於

閣中

御製平定回部碑文勒石太學並

命儒臣纂輯方畧四十一年金川平定定西將軍大學

士誠謀英勇公凱旋回京

上親行郊勞並如二十五年之儀慶賀祇告

賜宴繪像並與二十五年同

御製平定金川碑文勒石太學並

命儒臣纂輯方畧

獻俘受俘

康熙三十六年

親征朔漠王師大捷哈密擒厄魯特噶爾丹之子色布騰
巴勒珠爾俘獻於

駐蹕之神木縣

聖祖仁皇帝御行營受俘遣送

京師拘禁於理藩院旋奉

旨赦而不誅至四十年宥釋授以一等侍衛給之妻室

雍正二年

命將討平青海解送俘囚至

京師欽天監擇日獻俘於

太廟

社稷至期兵部率解俘官員兵丁押所解之俘白組繫
頸至

太廟街門外向北立候承祭官至俘向北跪承祭官入

太廟陪祀文武各官分東西班豫集承祭官就行禮位行

禮如時饗儀禮成兵部率解俘官員兵丁押俘至社稷街門外候承祭官入

社稷壇行禮如春秋祈報儀禮成兵部率解俘官員兵丁押俘出次日行受俘禮前期工部設

御座於午門樓檐下正中至日武備院鑾儀衛陳設諸王以下文武各官咸齊集

皇帝鑾輿出宮

陞寶座兵部堂官奏平定青海所獲叛逆俘囚謹獻

闕下請

旨宣

制曰所獻俘交刑部刑部堂官跪領

旨押俘出王以下文武各官行三跪九叩禮

聖駕還宮是日

賜解俘官員兵丁銀幣有差

恩賜該將軍鞍馬采幣其擒獲俘囚之將校及管領擒獲

之人分別各加賞賚

廟

乾隆十四年議准凡出師克捷應照雍正二年平定青海以俘獻於

社如儀獻俘次日行受俘禮均如雍正二年之儀有赦而不殺者奉

旨釋縛交理藩院二十年征準噶爾擒獲巴朗孟克特墨爾羅卜藏丹津獻俘受俘儀同二十一年平定伊犁擒獲達瓦齊獻俘行禮宥罪儀同二十五年

平定回部
圖霍集占之首以獻
四十一年平定金川
逆酋全就俘獲並獻
俘受俘如儀

皇朝通志卷四十四

欽定四庫全書

皇朝通志卷四十五

禮畧

軍禮二

臣等謹按

皇朝軍政嚴肅聲威燁赫簡閱訓練齊之以禮自

列聖以來詰戎典制載在方策我

皇上整飭戎行申嚴武備

訓諭彰明每三歲一舉

大閱之典而

秋巡鉅制每歲舉行木蘭

行圍習勤肄武所以闡揚

光烈垂示萬年典至鉅也謹稽

大清會典通禮述

大閱

大狩二篇以誌軍禮之整嚴詳備景燦前古昭示方來

馬

大閱

順治十三年奏定冬季農隙之時

大閱武事令官兵披執操演宰牛羊設筵燕黜陟賞罰十

六年

諭大閱典禮三年一行永著為例著即傳諭各旗官兵整

肅軍容候秋月朕親行閱視是年

大閱如儀

康熙二十四年

聖祖仁皇帝諭兵部國家武備不可一日懈弛舊例每歲必操練將士習試火礮爾部傳諭八旗都統等豫為整備朕將親閱焉是年

上由午門出宣武門八旗都統各率所部將士擐甲胄屬索韃建旗纛自灣子里夾道分列至拱極城前鋒官軍自盧溝橋夾道分列至王家嶺山麓官軍排列槍礮分東西次第布列

上登王家嶺

御黃幄陞座軍中吹螺角者三發巨礮三排槍相繼齊發
命將士發巨礮八旗所列將軍礮位及諸火器一時齊發

凡二次禮成

御行宮召扈從諸王大臣等

賜燕畢

御黃幄設布侯較射而還三十一年

聖祖仁皇帝幸玉泉山大閱八旗前鋒護軍驍騎及火器

營兵皆擐甲胄分翼排列

上由右翼至左翼周閱畢登玉泉山

御黃幄官兵吹角發礮二次馬步軍鳥槍齊發以次退立
命八旗鳥槍兵演習連環旋轉二次放槍各一次三十四
年

聖祖仁皇帝幸南苑大閱擇於

南苑西紅門曠地八旗官兵槍礮按旗排為三隊第

一隊以漢軍火器營鳥槍步軍居中礮位排列左

右滿洲火器營鳥槍列於礮之兩傍第二隊以前
鋒軍居中八旗護軍列兩傍第三隊列八旗護軍
兩翼則設應援兵屆期

上率

皇子等親擐甲胄前張黃蓋內大臣侍衛大學士及
各部院大臣均扈從繼以豹尾班侍衛後建黃龍
大纛二上三旗侍衛擐甲胄均按次隨從

上周閱八旗兵陣火器營立於馬軍之前正中鳴角者三

擊鼓步軍舁鹿角大礮象兵齊進鳴金而止發鳥
槍一次如是者九第十次火器營馬步軍槍礮連
環齊發無間鳴金而止開鹿角為八門後二隊馬
軍隨出既成列鳴角呼噪而進復鳴角收軍立於
本陣結隊徐旋其殿軍立於後

大閱畢

上還行宮

特降敕諭申明軍令宣示於大閱之地是日未閱前官兵

均

賜食閱後

賜酒

雍正六年奏定

大閱官兵數目及器械營伍均宜定有成規以垂永久所
定軍律具見

大清會典

乾隆三年奏定凡奏請閱兵由兵部三年一次於

歲杪具奏請

旨如遇

皇帝閱兵之年由兵部先期開列諸王並領侍衛內大臣都統前鋒統領護軍統領等銜名具奏恭候

欽點王公大臣操演兵丁其本年八旗合操及點驗器械均停止至管隊大臣除滿洲火器營總統前鋒統領各率本營兵丁排列外所有管領漢軍火器兵應用都統四人副都統八人首隊應用都統四

人護軍統領二人副都統八人次隊應用都統二人護軍統領二人副都統四人左右兩翼兵隊應用都統二人護軍統領二人副都統四人共四十二人由演兵王大臣等簡選繕名籤具奏恭候

欽定應用將校甲兵由演兵王大臣行文各該旗按佐領數目分撥八旗大臣於出場馬匹未回之先將該旗撥出大閱之官兵於本旗教場操演若值滿洲蒙古漢軍三旗合操於兩黃旗教場操演若四

旗合操或於安定門外或於仰善窪操演竣場馬
全回演兵王大臣等先於仰善窪會合八旗操演
一二次再往

南苑操演一二次恭候

皇帝大閱四年奏定

大閱吉期由操演兵丁王大臣約計月分奏請交與欽
天監選擇先期二日各旗往

南苑設立連營演兵王大臣等會同領隊大臣率官

兵前往住宿武備院設

御營帳殿於

南苑晾鷹臺

帳殿後設圓幄恭候

皇帝躬御甲冑鑿儀衛於

帳殿前左右設三旗蒙古畫角侍衛班領設親軍海

螺兵部設八旗傳令海螺於臺下乘馬以次排至

鹿角前八旗各建號纛於本旗汛地中列八旗漢

軍鹿角於陣前次列漢軍礮車左右列滿洲礮車
烏槍護軍驍騎以次排列八旗前鋒在火器營兵
之後首隊之前排列其次護軍驍騎各按本翼本
旗排列成陣次隊護軍驍騎在首隊兵後按翼按
旗排列又設兩翼援兵於首隊兩旁各張旗幟既
成列兵部堂官奏請

皇帝閱操

皇帝駕臨晾鷹臺圓幄

躬擐甲胄扈從內大臣侍衛親軍等均甲胄兵部堂官
奏請

親閱隊伍內大臣兵部堂官前導後扈從大臣及總理演
兵王大臣隨從之

御前大臣侍衛

乾清門侍衛滿洲大學士等均隨行其次豹尾班侍
衛隨行又次黃龍大纛隨行又次上三旗侍衛按
次隨行在火器營兵之後首隊之前自左至右閱

隊一周還

御涼鷹臺帳殿兵部堂官進前跪奏請鳴角

帳殿前蒙古畫角先鳴次親軍海螺傳令海螺以次
遞鳴聲至鹿角前首隊次隊海螺齊鳴傳令海螺
漸次退至臺下兩邊排列舉鹿角兵聞鼓而進鳴
金而止麾紅旗則槍礮齊發鳴金則止如此九次
至第十次連環齊發鳴金三次連環乃止滿洲礮
至第七次停發將礮馱載馬上入隊隨行連環發

畢鳴金後鹿角分為八門首隊前鋒護軍驍騎排
開駐立次隊亦隨進在礮槍之後駐立首隊排齊
候鳴螺皆聲喊前進兩翼應援兵亦斜向前進以
次及殿後兵進八旗火器營礮位烏槍護軍驍騎
首隊前鋒護軍驍騎按數各赴本旗號纛相近處
駐立將鹿角分為八行鳴螺而回在原排列處排
列首隊兵回後鳴螺殿軍亦結隊回鹿角內在原
排列處排列畢兵部堂官奏

大閱禮成

駕御圓幄釋甲胄隨從大臣侍衛隨釋甲

駕還行宮以次

賜食賞饌筵有差十四年奉

旨特設健銳營於香山並定練習操演之制十七年奏

定香山健銳營每月逢四九日操演雲梯大隊三

槍逢二七日演撲躍馬騙馬三槍舞鞭舞刀射箭

逢三五八十等日操演水戰其一六日各於本旗

較馬步射放槍恭遇

駕駐圓明園每日操演水戰常用船四號逢八日大
操用船八號均用金龍旗幟自後每歲冬季

皇上幸香山

閱操訓練嘉獎以次

賞賚各有差二十年奏定

大閱日陳騎駕鹵簿於

行宮門外

駕出作鏡歌大樂奏壯軍容之章

回鑾作鏡歌清樂奏皇威之章

駕將出聲礮三

駕御帳殿開操軍中三舉礮

大閱禮成

駕回行宮聲礮三將士各歸營釋甲冑

大狩

天命十年四月

太祖高皇帝自瀋陽城出獵嚴飭武備申明禁令

訓示行軍之法

天聰二年十二月

太宗文皇帝率諸貝勒羣臣出獵於三窪地

上親殪五虎從臣皆驚服降

旨諸貝勒射中之獸有爭論者付審理官驗對隱名驗傷

即付傷痕相符之人六年十月

上行獵至新哈達地方翼日獵於費德里山

上還瀋陽

諭諸貝勒大臣曰凡出兵行獵時有為盜者論罪大小或殺或鞭久著為令乃此番行獵仍有盜鞍轡靴屨等物者是法令不彰而人不遵守夫蒐苗獮狩原以講習武事必紀律嚴明然後人不敢犯今行獵兵少尚多犯法若師行動衆將何以約束之乎爾諸貝勒大臣其徧行親察嚴加懲治於是諸貝勒大臣嚴查緝獲

上以就彼地處分恐衆人不知令攜至瀋陽梟首以徇八

年十一月

上率諸貝勒獵於蒙古地方

諭曰蒐苗獮狩古人原以之講武須有紀律若猝遇猛獸不可輕射毋許一二人逗留在後有逗留者執之若遇黃羊勿逼近追逐恐逼逐之反致從後逸出爾等各按汛地分圍駐守帶傷之獸不可隱藏馬之羈勒鞍韉毋相私竊違者罪之

順治三年十月禁官員人等於近京百里內圍獵

貝勒以上欲獵於百里外者必請

旨方行違者治罪八年定凡遇

大狩之期

鑾駕啟行陳鹵簿內大臣侍衛等均於

駕後分隊隨行每隊馬首排齊前後相距丈許各隊伍

毋許越次遇狹隘處候首隊過畢後隊方行若奉

旨傳後隊侍衛等官由兩旁進退不許衝入儀仗侍衛

等官從人均在後隊隨行若侍衛等官易馬至後

隊易畢即馳入本隊扈從王貝勒等恭候

駕出即乘馬在旁稍後隨行王等各隨護衛三人按左

右翼隨行王貝勒等赴

御前止許親身從旁入

召問則勒馬稍後欠身恭對赴

駐蹕所於三十餘丈外下馬扈從都統統領副都統等

各率所屬官兵按旗以次隨行赴

駐蹕所於六十餘丈外下馬十年三月

世祖章皇帝幸南苑行圍申禁號令如儀

臣等謹按

南苑行圍

世祖親政以後

聖祖御極之初歲每舉行以肄武事

皇上登極以來亦以歲時習武於此比於周之靈囿茲特舉一以見例其餘不復備載云

康熙元年定恭遇

御駕行圍嚮導奏定

駐蹕之地護軍統領營總各一人率護軍叅領護軍校
護軍預往相度地勢廣狹同武備院卿司幄及工
部官設立

行營中建帳殿

御幄繚以黃髹木城建旌門覆以黃幕其外為網城
正南暨東西各設一門正南建正白東建鑲黃西
建正黃護軍旗各二東西門後三面設連帳旌門

領侍衛內大臣率侍衛親軍宿衛網城門八旗護
軍統領率官兵宿衛又外八旗各設帳房專委官
兵禁止喧譁

御營之前扈從諸臣不得駐宿東四旗在左翼西四旗
在右翼均去

御營百步建鑲黃旗護軍纛於後正黃旗護軍纛於右
正白旗護軍纛於左扈從人等各按翼駐宿去

行營二里外前鋒營相形勢設卡倫於路左右八旗

各設帳房豎旗幟以為偵哨以禁行人蒙古王公
台吉去

御營三五里外各酌立營帳路中設頓營或一或二亦
由嚮導指定地方護軍叅領率護軍建黃布幔城
武備院設帳殿每日輜重行時豫期奏請

欽點大臣數人統轄武備院卿嚮導護軍叅領率

御營輜重前行次三旗營總護軍叅領率三旗護軍轟
并行王以下輜重均各隨轟行毋許攬越十年奉

旨停用木城均用黃布幔城二十一年二月

聖祖仁皇帝巡幸盛京出山海關行圍抵廣寧次烏喇途

中皆

親御弓矢行按獵之典嗣後每歲出口行圍或一歲再舉

垂為成典十一月定派兵口外行獵之制奉

諭一年派兵一萬二千名分為三班一次行獵撥兵四千

於四月十月十二月令其前往行獵則兵既少水草易
得人馬俱不至困乏近見部院官員不諳騎射者多此

次行獵亦着一併派出令其嫻習騎射二十四年六月
上幸古北口外行圍

臣等謹按康熙二十四年

上幸古北口外行圍實為秋獮大典所由始自是每年
肄武訓戎綏輯藩服垂為成軌增葺

行宮建立圍場法制昭於萬古茲誌始事之年自後
每歲

行圍有紀載不能盡述者並互見於

皇朝通典通考茲不備詳焉

三十三年設虎鎗營時黑龍江將軍送精騎善射
殺虎新滿洲四十人到京令分隸上三旗設虎鎗
營總統一人以內大臣或侍衛充每旗設虎鎗總
領以大臣侍衛叅領官員充凡

大狩行田則從遇大獸則列鎗從之若

命殺虎則以首先刺虎一二人名奏

聞四月令各省駐防兵每年分班行圍四十二年建

行宮於熱河曰

避暑山莊自古北口至熱河

車駕頓宿之所曰巴克什營曰兩間房曰常山峪曰王家

營曰喀喇河屯自熱河至圍場曰中關曰波羅河

屯曰張三營皆有

行宮四十八年四月

上巡幸塞外九月

上於巴顏托羅海圍場獲異鹿藏其角於內庫

臣等恭讀

皇上御製鹿角記曰嘗閱武庫所藏

皇祖時鹿角一記曰康熙四十八年九月五日

上於巴顏托羅海所獲其長自剗骨至尖各三尺九寸有
十分寸之五兩尖抵直得七尺有九寸兩末徑距凡
四尺又之數十有六最末者不尖而博狀如魚尾又
如芝朶近剗者其圍八寸有十分寸之二既堅且澤
不絪而昔景爍哉是蓋我

皇祖神威所攝山靈不敢闕其珍用出異獸以燕
聖人而什襲天府示我後昆俾無忘

先烈詰戎益勤也謹按

奎記昭垂承

謨紀瑞仰見

聖祖神武之貽

皇上紹承之烈實景燦萬古云

六十年

上幸塞外行圍

諭議政王大臣等從前曾有以朕出口行圍勞苦軍士條
奏者不知國家承平雖久豈可遂忘武備前噶爾丹攻
破喀爾喀并侵擾我內地扎薩克至烏蘭布通朕親統
大兵征討噶爾丹敗走後又侵犯克魯倫朕統兵三路
並進至昭默多剿滅之今策旺阿喇卜坦無端侵擾哈
密地方朕徵發阿爾泰及巴爾庫勒兩路兵進剿策旺
阿喇卜坦聞之心膽俱碎乃遣策凌敦多卜等潛往西

藏剽掠毀壞寺廟土伯特地方已被殘蠹朕又遣大兵
前往擊敗策凌數多卜等復收西藏救土伯特於水火
之中我兵直抵西藏立功絕域此皆因朕平時不忘武
備勤於訓練之所致也若聽信從前條奏之言憚於勞
苦不加訓練又何能遠至萬里之外而滅賊立功乎爾
等諸臣咸宜知之

雍正八年令八旗人等學習步圍

乾隆元年四月奉

旨專設總理行營王公大臣一人凡行營一應行程圍
獵駐蹕守衛等事均隸焉六年七月

上幸木蘭行圍先是三月奉

諭國家武備不可廢弛朕於本年秋月出口行圍原以
訓練兵丁仿古蒐獮之禮昔我

皇祖每歲舉行所經由道路及一切事宜俱有章程朕今
歲踵行悉遵舊制地方官員或借端派累隨從之人
或有恣意需索及強買物件不按時價者著直隸督

撫不時查叅毋得容隱七月啟行

降旨免所過州縣今年額賦十分之三嗣後每年

聖駕出口行圍蠲免額賦例並同八月入圍場九月

回鑾王公大臣等恭迎如儀木蘭周一千三百餘里南

北相距二百餘里東西相距三百餘里周遭設卡

倫守之每歲白露後鹿始出聲而鳴效其聲呼之

可至謂之哨鹿

國語謂之木蘭今以為圍場之通稱凡圍場之名曰

塔哩雅圖曰永安莽喀曰巴顏喀喇曰威遜格爾
曰溫都爾華曰額爾滾果曰巴顏布爾哈蘇台曰
巴顏溝曰岳樂曰珠爾曰巴顏木敦曰德爾吉曰
達顏德爾吉曰必圖舍哩曰阿濟格鳩曰多滿曰
額埒蘇實納曰額倫索果圖曰庫爾圖察罕曰實
喇德卜色曰額爾吉圖察罕曰永安拜色欽曰巴
顏圖庫瑪曰鄂爾吉呼哈達曰永安拜曰英圖曰
哈里雅爾曰喀喇瑪拉噶曰齊老圖德爾吉色欽

曰明安阿巴圖曰德勒格楞桂鄂博曰孟魁色欽
曰巴顏托羅海曰布克曰汗特穆爾曰庫庫哈達
曰愛里色欽曰喀喇楚古素曰克呼曰古爾班實
納曰察罕扎卜曰實納諾海曰噶海圖曰布古圖
曰默爾根烏里雅蘇台曰呼魯蘇台曰巴拉圖曰
色呼曰扎哈烏里雅蘇台曰都呼岱曰哈達圖扎
布曰圖們色克圖曰們都阿魯曰坡賴曰默爾根
精奇尼曰古爾班古爾班曰森濟圖曰布都哩曰

珠爾噶岱曰哈朗桂曰和賚果勒曰叟濟曰崆果
爾鄂博曰阿嚕布魯克曰巴顏莽喀曰沙爾當曰
圖爾根伊兆爾凡六十餘所每歲

車駕大獮或十八九圍或二十圍逾年更易永以為制
凡每歲設圍預期定圍場於某處自某處起經由
某處於某處收圍均編定地方至期官兵於黎明
即赴圍場布圍成列恭候

御蹕臨圍射獵又以八旗官軍善騎射者於蒙古圍外

環以重圍以射逸出圍外之獸十二年七月更定
隨圍蒙古王貝勒貝子公等常賜之例十六年

申諭各省陸路提鎮於冬月照例行圍十七年

上幸木蘭行圍

御製虎神鎗記勒石於岳樂圍場

御製記曰虎神鎗者我

皇祖所貽武功良具用以殪猛獸者也國家肇興東土累

洽重熙惟是詰戎揚烈之則守而弗失

皇祖歲幸木蘭行圍諸蒙古部落雲集景從予小子雖不敏纘承之志其敢弗葢故數年以來巡狩塞上一如

曩時蒙業藉

靈四十九旗及青海喀爾喀之仰流而來者亦較前無異焉若輩皆善射重武使無以示之非所以繼

先志也圍中有虎未嘗不親往射之弓矢所不及則未嘗不用此鎗用之未嘗不中壬申秋於岳樂圍場中獵人以有虎告而未之見也一蒙古云虎匿隔谷山洞

問彼親見之相去蓋三百餘步朕約畧向山洞施鎗
意以驚使出耳乃正中虎虎咆哮而出負嵎跳躍者
久之復入復施一鎗則復中之遂以斃焉蓋向之發
無不中乃於谿谷叢薄目所能見之地斯已竒矣而
茲岳樂所中則隔谷幽洞並未見眈眈闕如之形於
揣度無意間馥焉深入不移時而殪猛獸則竒之最
竒其稱為神良有以也夫萬乘之尊詎宜如孟克特
庫之流誇一夫之勇哉

孟克喀爾沁蒙古人特庫滿
洲今為內大臣皆能獨搏猛

獸如馮婦者

而習武示度必資神器以效竒而愉快則是鎗也與克戈和弓同為宗社法守不亦宜乎二十年

定行圍

御營建黃幔城外為網城網城連帳百七十五架設旗門三南門建正白金龍纛二東門建鑲黃金龍纛二西門建正黃金龍纛二周圍建鑲黃金龍三角旗共四十一守以上三旗護軍去網城連帳十有二丈為外城連帳二百五十四架設旌門四南門

一日建正藍金飛虎纛二一日建鑲藍金飛虎纛
二東門建鑲白金飛虎纛二西門建鑲紅金飛虎
纛二北門建正紅金飛虎纛二周圍東南面建正
白西南面建正紅東北面建鑲黃西北面建正黃
金飛虎方旗共六十守以下五旗護軍去外連帳
六十丈周圍設警蹕帳房四十架每帳房建護軍
旗各一東南面正藍西南面鑲藍東北面鑲白西
北面鑲紅共四十以八旗護軍專司警蹕二十四

年建濟爾哈朗圖

行宮自波羅河屯入圍場有二道東道由崖口西道
由濟爾哈朗圖每歲行圍多從崖口出入至是建
行宮於濟爾哈朗圖二十七年復於濟爾哈朗圖之
北建阿穆呼朗圖

行宮嗣後

聖駕行圍若從崖口入則

回鑾由濟爾哈朗圖若從濟爾哈朗圖入則

回鑾由崖口永以為例凡木蘭行圍儀具見

大清會典及通禮

臣等謹按

皇上紹承

前烈歲舉

行圍大典規制精詳

訓肄整肅舊藩四十九旗及喀爾喀青海諸部分班隨

圍綏輯備至西域蕩平以來遠藩如左右哈薩克

東西布魯特安集延布哈爾等率先朝覲歲月踵
至土爾扈特部挈其部衆越數萬里而來歸順皆
於熱河圍場撫輯覲宴一道同風無遠弗屆每遇
行圍之期

上必躬御鎗矢自麇鹿豕兔以至羆虎巨獸無不壹發
洞中

聖武丕昭紀載不能盡悉肆勤

紹

武鉅典閱猷洵足垂訓於萬禩已



皇朝通志卷四十五

欽定四庫全書

史部

皇朝通志卷四十六至
九

編修臣錢樾覆勘

總校官編修臣倉聖脉

欽定四庫全書

皇朝通志卷四十六

禮畧

賓禮

臣等謹按鄭樵通志賓禮一門惟列三恪二王後
一條序山陽陳留零陵介國鄗公之事規制庠陋
不足垂為典禮我

朝

列聖加禮勝代至隆極渥超軼前古雍正元年

世宗憲皇帝諭朕近於

聖祖仁皇帝所遺書笥中檢得未經頒發

諭旨以明太祖崛起布衣統一方夏經文緯武為漢唐宋

諸君之所未及其後嗣亦未有如前代荒淫暴虐亡國
之跡欲大廓成例訪其支派一人量授官爵以奉春秋
陳薦仍世襲之朕伏讀之下仰見我

聖祖仁皇帝天覆海涵深仁大度超軼萬古遠邁百王朕

思史紀東樓詩歌白馬商周以來無不推恩前代後世
類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所遺

諭旨頒發訪求明太祖支派子姓一人量授爵秩俾之承

襲以奉春秋祭饗大學士即會同廷臣詳明妥議以副

聖祖仁皇帝寬仁矜恤之至意旋遵奉議上明代後裔有

鑲白旗見任直隸正定府知府朱之璉乃明太祖

第十三子代簡王嫡派奉

旨授為一等侯爵世襲授爵之後遣往江寧祭明太祖陵

一次祭畢回

京往昌平州祭明十三陵一次嗣後每年春秋二次

致祭至於明陵所在

列聖以來疊加修整防護乾隆五十年

皇上親幸長陵不惜百萬帑金

降旨諸陵皆如制修葺優禮前代

曠典特頒誠無取於賓恪之虛文為也恭讀

御製新樂府二王後詩云三恪二王古有云受禪征伐
說徒紛魏晉以降更以假不修實德修空文元之瀛
國明崇禮雖加封爵未聞延至奕世享隆恩

天命

天聰肇東土

順治奄有中外建極尊然實取之流寇並非取之勝國者
豈於明之後裔有所慙德而當待以賓

康熙有成命

雍正舉以遵遂求朱氏之裔賜以通侯俾世守其祀而弗

湮則我

祖宗興滅繼絕之意超往代詎如李唐周旋周武隋文之

子孫煌煌

聖謨昭示

本朝成法垂訓萬古茲輯通志鄭氏三恪二王後一

條應從刪去而明著大義於簡端至賓禮之大者

藩服朝貢之制鄭志皆闕畧未載謹考周禮大行人掌賓客之禮儀九州以外謂之蕃國各以其貴寶為贄我

國家聲教暨訖四荒來賓徼外山海諸國典之禮部百餘年來

敕封燕賚諸典儀文詳洽爰遵

大清通禮之例輯為賓禮至漠南內扎薩克暨喀爾喀扎薩克青海西藏諸部暨西域回部外蕃諸朝貢

儀節載於會典理藩院編謹詮次大畧著於篇中以彰

聖朝賓服無外之盛軌而百官士民相見之儀附載其畧於後

朝貢

凡四夷屬國按期修職貢遣其陪臣齋表文方物來朝

京師貢使將入境朝鮮以禮部通官二人迎於

盛京鳳凰城安南琉球緬甸暹羅荷蘭蘇祿南掌諸國貢道所經之省督撫遣佐貳雜職官一人迎於邊界西洋以內務府司官及西洋人供職欽天監者各一人迎於廣東皆給以郵符經過地方有司供其次舍廩餼車舟夫馬沿途營汛遞遣官軍防護以達於

京畿禮部豫行工部修飾館舍備器用薪炭戶部給粟米芻豆光祿寺給牲魚酒漿蔬菓之屬既至提

督會同四譯館鴻臚寺少卿飭屬延接入館以時
稽其人衆均其飲食貢使就館翼日檢其方物表
文貢使暨從官各服本國朝服以蒞禮部儀制司
官設表案於堂上正中黎明館卿朝服率貢使詣
部由左角門入恭蒞階下之左正使奉表在前副
使次之從官在後鴻臚寺贊跪貢使以下皆跪贊
接表正使舉表館卿恭接以授禮部侍郎侍郎受
表陳於案正中復位贊叩興正使以下行三跪九

叩禮興序班引退館卿率以出儀制司送表內閣
竣

命下禮部以方物分納所司貢使上表訖恭遇大朝常
期

皇帝御太和殿百官行禮畢序班引貢使暨從官詣丹
墀西班末

賜坐

賜茶如儀若不遇朝期禮部誦日奏請

召見館卿豫戒貢使及通事官習肄禮儀至日率貢使服其國公服通事補服詣

宮門外祇竣

皇帝御便殿領侍衛內大臣內大臣侍衛左右侍立如常儀禮部尚書一人蟒袍補服引貢使入通事隨入至丹墀西行三跪九叩禮畢引由西階升至

殿門外跪

皇帝降

旨慰問禮部尚書承傳通事轉諭貢使貢使對詞通事
譯言禮部尚書代奏禮畢興引自西階降出引退
如待以優禮是日

皇帝御便殿侍衛如前議政大臣暨八旗大臣咸蟒袍
補服入

殿按翼侍立禮部尚書引貢使至丹墀西行三跪九
叩禮興引由西階升入

殿右門立右翼大臣之末通事隨入稍後立

皇帝有

旨賜坐領侍衛內大臣內大臣議政大臣八旗都統副都統禮部尚書就立位一叩序坐貢使跪叩坐乃賜茶尚茶進

皇帝茶衆跪叩侍衛徧授大臣及貢使茶咸跪受一叩坐飲畢跪叩如初

皇帝降

旨慰問貢使跪聆答奏皆禮部尚書承傳通事譯言如

前儀禮畢禮部尚書引貢使出至朝房承

旨賜貢使尚方飲食訖館卿率以退翼日黎明領赴

午門外謝

恩鴻臚寺傳贊貢使行三跪九叩禮如儀退朝貢禮畢

禮部疏請

頒賜國王並燕賚使臣及其從官從人既得

旨移諸司供備翼日所司陳

賜物於午門外道左皮幣布帛白金陳於案馬陳於庭

鞍轡具

唯朝鮮貢使
賜馬

館卿朝服率貢使暨從官各

服其國朝服由東長安門

天安門

端門至西朝房前東面序立祇候禮部侍郎以下衆

官序立鳴贊贊齊班序班引貢使至西丹墀門以

次序立北面東上贊行三跪九叩禮畢主客司官

奉頌給國王

賜物前授貢使貢使跪受轉授從人乃以次頌貢使及

從官從人

賜物主客司捧授各跪受訖贊行三跪九叩禮興引退
館卿率貢使及從官從人出

賜宴於禮部如儀畢皆退事竣貢使將回國光祿寺備
牲酒菓蔬禮部侍郎一人詣館舍筵燕如儀朝鮮
南掌仍以迎接官伴送出境安南琉球緬甸暹羅
荷蘭蘇祿禮部奏

遣司官一人伴送西洋以原迎官二人給郵符沿途

供館舍舟車飲食官軍防護如初來禮至貢道所
經省會

賜燕司道一人主之儀與禮部燕同督撫大吏別遣官
送出境自京伴送官以事竣復

命於

朝凡貢道朝鮮由鳳凰城琉球由福建荷蘭由廣東
後改由福建緬甸由雲南安南由廣西太平府西
洋由廣東暹羅由廣東蘇祿由福建南掌由雲南

凡貢期朝鮮每年進貢一次並

聖節元旦冬至三大節為四貢同進琉球二年一次荷
蘭八年一次後改為五年一次安南三年一次後
改為六年一次暹羅三年一次南掌五年一次後
改為十年一次蘇祿五年一次凡貢物各將其國
之土物非土產者勿進朝鮮安南琉球緬甸蘇祿
南掌皆貢有常物西洋暹羅無常貢惟其所獻或
輸內務府或入武備院或納鑾儀衛或留於

盛京及邊省各付所司備用有因事慶賀及謝

恩加貢者廩餼賚予如常儀其方物則留充正貢之數
凡從人朝鮮貢使從書狀官一人大通官三人護
貢二十四人有賞從役三十人無賞從役無常數
琉球西洋暹羅蘇祿貢舟無過三每舟人無過百
赴京無過二十安南緬甸南掌入貢人無過百赴
京無過二十其不赴京者留於邊境邊吏廩餼之
埃使回至邊率之歸國

敕封外國

凡朝貢之國世子嗣位權攝國事遣其陪臣請命於

朝禮部疏

聞得

旨報可工部製

節內閣撰

敕均送禮部禮部奏

遣正副使各一人持

節齋

敕往封朝鮮封使以內大臣禮部滿侍郎內閣滿學士
侍衛充服色儀從各從其品安南琉球以翰林院
侍讀侍講編修檢討六科給事中禮部郎中員外
郎主事內閣中書充

特賜一品麒麟服儀從皆視一品啟行之日工部給龍
旗御仗牌纛兵部給乘傳防護官軍皆候於禮部

大門內禮部儀制司官設案於堂上正中陳

節於左陳

敕於右尚書侍郎二人於案左右立儀制司官二人隨

其後均朝服封使朝服詣部至堂中跪儀制司官

一人奉

節一人奉

敕各授尚書侍郎以授正副使皆恭接以興出儀門外

官軍接奉加節衣負

敕書乘馬行旗仗前導使者易征衣乘傳偕行封使入所封國境其國邊吏供備館傳夫馬所經之地文武官出郊跪接如迎

詔書之儀將及國嗣封國王遣其陪臣出郊迎接

敕書勞使者飾館舍供帳於國門之外備龍亭香亭旗仗鼓樂祇候於館列屏於王殿上設案於正中前設香案均南向設國王受封位於香案南拜位於受封位之南設衆官拜位於庭內東西皆北面贊

禮二人位國王拜位之北引禮二人位贊禮之南
引班四人位衆官拜位之北皆東西面樂陳於門
內儀仗陳於庭中皆左右分列使者既及國迎接
官迎至館恭設

節

敕於龍亭內馳報國王王率其國陪臣朝服郊迎迎接
官以龍亭行香亭旗仗鼓樂前導使者乘馬從國
王以下咸跪候過輿隨入國門至府龍亭入中門

升階陳於正中使者及階下馬從升執事者脫節
衣奉

節授正使前行奉

教授副使隨行入殿使者陳

節

敕於中案皆退立案東宣讀官列於使者之後引禮引
國王就拜位北面引班引衆官均就拜位北面立
贊禮贊跪國王率陪臣皆跪贊叩興國王以下行

三跪九叩禮興國王進至受封位前贊禮贊跪國
王跪副使進奉

敕書付宣讀官西面展讀訖以

敕書授國王國王祇受轉授從官跪接以興副使復位
國王三叩興退至拜位前復行三跪九叩禮興率
其陪臣出埃門外正使奉

節詣龍亭執事者加節衣陳於亭昇出使者隨出國王
以下跪送使者以

節詣館國王乃易常服適館勞使者揖讓行禮畢退饗

燕致饗餼如儀及歸率其陪臣跪送

節於國門外如初迎禮使者回

朝以事竣復

命還

節並

賜服於所司使者既還

朝王乃修表文具方物遣其陪臣詣

闕謝

思廩餼燕賚均如常朝貢之儀若外夷歸誠初奉

朝命者禮部奏請

命正副使持

節齋

敕印往封儀與前同若荒遠阻絕之區以

敕書授來使齋回儀制司官設案於

午門外甬道上正中陳

敕尚書一人立案左儀制司官隨其後鴻臚寺鳴贊二人立甬道左右均朝服館卿率來使朝服入至西丹墀內祇候鳴贊贊授

敕序班詣案前北面贊跪來使跪儀制司官一人奉敕授尚書以授來使來使恭接授從官興退詣丹墀之西贊行三跪九叩禮畢乃恭齋回國以授其國王遣使詣

闕謝

恩如儀

科爾沁等扎薩克朝貢

國家肇基東土威德遠播漠南蒙古諸部落或誼屬
戚畹或著有勲績或率先歸附咸奉其土地人民
比於內臣設官分職與內八旗無異每歲分班

朝覲修貢唯謹秋月扈從

行圍各依班次

朝見燕饗

賜予舍館饗餼之禮成典維昭咸隸於理藩院王會司
詳見

大清會典其貢道科爾沁扎賴特杜爾伯特郭爾羅斯
由山海關土默特喀喇沁教漢奈曼扎魯特阿魯
科爾沁翁牛特喀爾喀左翼由喜峯口烏朱穆沁
巴林阿霸垓蒿齋忒阿霸哈納爾克什克騰由獨
石口四子部落蘇尼特毛明安喀爾喀右翼由張
家口吳喇忒歸化城土默特鄂爾多斯由殺虎口

來朝班次分為三班周而復始歲以十二月十有五日後二十五日前咸集王以下均行三跪九叩禮奉

制書亦如之親王郡王貝勒貝子公在宗室親王郡王貝勒貝子公之下一二等台吉在內大臣之下其次為子又其次為三等台吉又其次為都統又其次為四等台吉又其次為副都統又其次為叅領佐領其男以下雲騎尉以上各依品級序班凡貢

物每旗進羊一羴乳酒一掬以歲除日新正十四日十五日各

賜燕一次餘日五旗王府各設燕一次自王貝勒以下至長史護衛等官咸與馬凡賞賚廩給牧芻路費均有常制

喀爾喀青海西藏朝貢

國初蒙古北部喀爾喀三汗同時納貢厥後朔漠蕩平庇我宇下與漠南諸部落等承平以來懷柔益

遠北逾瀚海西絕羌荒青海厄魯特西藏準噶爾
之地咸入版圖朝貢皆有常制其貢道喀爾喀四
部厄魯特土爾扈特由張家口獨石口喜峯口青
海由西寧西藏由四川之打箭鑪喀爾喀等

朝覲分為四班青海亦分為四班貢期各如其朝覲
之班西藏則間歲一貢附達賴喇嘛以進貢物喀
爾喀厄魯特以駝馬湯羊土爾扈特青海以藏香
氈毯西藏有佛像金經銀塔五色帕八吉祥之屬

朝覲燕饗賞賚餼廩收芻與漠南內扎薩克諸部

落同

西域外藩朝貢

我

皇上聖武丕昭既平定準噶爾凡天山以南回部素為
準夷所羈屬者如解倒懸歸仁恐後厥後逆回負
恩構亂

天戈所指臣服彌遠版圖所隸拓地二萬餘里今自嘉

峪關而外舊部若哈密若闐展吐魯番新疆若哈喇沙爾若庫車若沙雅爾若賽喇木若拜達克若阿克蘇若烏什若喀什噶爾若葉爾羌若和闐若布星羅同屬內地至土爾扈特遠隔俄羅斯境感慕

皇仁挈其部屬三萬餘衆越數萬里之遠誠心歸順

皇上撫綏安集俾恬居樂業等於內土齊民於是四衛拉特咸依化宇分班

朝貢職有成規乃至伊犁以外蔥嶺以西鱗集仰流

而至者遠抵西海則有若哈薩克左右部布魯特
東西部安集延瑪爾喀朗霍罕那木干塔什干巴
達克山博羅爾愛烏罕奇齊玉斯諤爾根齊諸部
落皆重譯輸誠遣使

朝貢列為西域之外藩各以其輸款來

京之先後

召見賞賚或

賜宴於瀛臺或

賜宴於熱河

行宮俾得與觀燈火與觀

大閱各授以

敕書遣貢使齎奉回國其貢期或間年或三年無常期

其貢物屬刀馬匹各以其國之所有賓服之盛遠
訖汜濛猗歟盛已

相見儀

國初定王公以下內外職官士民相見之儀其目曰

宗室外藩親王相見曰宗室外藩郡王相見曰宗
室外藩貝勒相見曰宗室外藩貝子公相見曰京
官敵體相見曰在京屬官見長官曰國學師弟子
相見曰直省官敵體相見曰直省文官見長官曰
直省武職見長官曰直省官見學政鹽政曰京府
官屬相見曰直省文武官相見曰直省滿漢官相
見曰直省學校師弟子相見曰賓友相見曰受業
弟子見師長曰卑幼見尊長辨等威慎禮度各有

恒式其儀並見

大清通禮

皇朝通志卷四十六